

四庫全書

集部

欽定四庫全書

集部

五百家播芳大全文粹卷

五十九
六十九

詳校官侍郎_臣劉躍雲

助教_臣常循覆勘

總校官編修_臣王燕緒

校對官中書_臣李荃

謄錄監生_臣徐紹城

欽定四庫全書

五百家播芳大全文粹卷五十九

宋 魏齊賢

葉 棻同輯

疊幅

宮祠

上丞相宮使小簡

毛伯穎

某請問起居狀太畧如右即日風霜益冷恭惟琳館宴

閒神佑勲德鈞候萬福某孤蹤尚茲匏繫未能引去從
杖屨為超世絕俗之游瞻邈高風下情不勝依戀之切
謹勒參候

一介之賤夤緣職事方幸得侍門墻遽遠比誨南望惟
劇犬馬之戀即日不審鈞用何似冬律肇寒願言對時
致和宣滯茂經壽祉副天下拳拳之心

竊以功成名遂天之道近時王公大人非苟知之亦允
蹈之者唯相公耳某與士大夫既誦詠高標遠躅有不

可跂及之嘆念方持顛扶危有能任重如相公者又為
國家惜其去也

前日方相公抗章謝客之際日至舟次既不容請間尚
庶幾追路一望台光而鈞旨亟行風檣頃刻已邈然矣
徘徊江干瞻悵結戀有兒女之感即日跂履伏計已遂
寧居盛德所至固有神明扶持若退之所謂務為崇深
輒敢為左右之獻伏惟留意幸甚幸甚

某至愚極陋無取於世故冬相公復以舊物收錄數月

之間樞屬宰掾皆平生夢想不敢到者相繼叨冒盡出
大鈞之播未知稱塞而相公有請去矣引領恩第祇益
戀慕某惇然於此欲請則未敢欲留則無依去留幾如
觸藩羊矣相公尚軫念否耶

上樞密使小簡

暮春之月景氣清淑恭惟勳大德隆高蹈物表百神森
衛台候動止萬福某謹具竿牘仰候記史

申問起居已具右幅暑律寢近敢乞上為宗社彌壽粹

和冲盛虛氣永服寵休區區頌禱實有識同之

奔走範圍之內頻有歲思欲整冠抗容望天人之儀表
叢霄杳邈厥路無由惟知誦當世之偉丈師厚俗之懿
行踴躍鈞播期不負於作成之化至若神馳夢想拳拳
於造化之門則又抱積結而已尚稽瞻拜矯首凝睇惟
深景慕之懷

恭以某官以直道事聖主以厚德浸黎元自初登朝已
傑然有公輔之望睿眷愈隆時論允屬年除歲遷以登

近弼人咸謂宜從容廊廟致吾君於堯舜之上使斯民
鼓腹擊壤以樂太平者非公其誰倚正鼎軸之拜天下
為賀

仰惟大雅君子明哲自保旃常竹帛既了能事復乃辭
榮高蹈毓和順志於冲澹之鄉川吟野詠以樂天真當
有安期赤松輩相與談笑於塵埃外也第恐冕旒注想
復為蒼生起太傅於東山耳後天下之樂而樂尚須貯
此以俟他日也冒言及此實用惡悖

某一介逃賤久困道路惟念家世以儒為業不敢失其
故習比者誤忝太常之奏猥玷銓籍實望不及此方茲
從官之初迺獲密賴洪河之潤幸可言耶竊某荒唐之
學固自無取矧於吏事尤切茫然教載之職大儒所任
况家兄昔為尚書郎又出榜下倘不以某之不肖立之
庭而薰沐之俾得揚眉吐氣激昂青雲則平生所志庶
幾少伸於今日倘不屑教是亦教誨之而已某敢不謹

承下風

近者交代報以及瓜促使首塗行即趨伏軒墀之下欣
非來集預不勝情謹修啟牘以姓名自通於鈞覽併乞
恕其僭率

鈞閱寶眷恭被鼎來之祉
泐路恐有委令拱聽要束

上樞密宮使小簡

夏序清和恭惟耆英舊德燕頤琳館言論風旨海宇瞻
頌神明鑿勞鈞候動止萬福某邈在陬徼無由款墻仞

謹具承候下執事

某勉強於此且一年半矣每有使介輒致書牘湖山綿邈沈浮
未知但增瞻嚮耳目近人還奉被去年五月二十一日誨墨置
之座隅一日三復仰佩盛德不遺亡簪屨之義豈勝感激也

伏以某官道德文章冠映海內勲閎巍然朝野注望然深執
謙沖久就閒曠清議嗟嘆豈某窮薄蹇頓攀鱗附翼自有時
也更冀以時保練惠綏沖氣即膺典冊於穆天緯重副頌願

上大觀文宮使小簡

王練之

問訊起居狀粗如常禮已春寒色尚凜即日恭惟琳宮
邃清神護賢業鈞候萬福某頽齡暮景分宜退縮尚叨
祠館之祿盡出鴻造惟是邈然未有陪侍鳩杖之緣引
領高風有弋人何慕之嘆謹勒叅候

故冬寓咫尺之書必浼間聽繼以得請而歸跼伏田野
亡從訪便貢記室問區區之心祇益景慕仰蘄妙理冲
和茂綏福履以篤鈞閣之慶以副海宇之望

竊以艱危以來主上論相數人其間藉英雄之姿奮經

濟之業整頓乾坤再造王室有如相公者其誰哉今者
均逸上至士大夫下至軍民莫不喁喁佇衮衣之歸益
著士儒之效願戒舍人束裝以待輿論如此敢私布之
恭聞相公弭節天台居處飲食雖南北異宜仰惟相公
簡約之素隨所寓而安之如在維揚時也門墻下客唯日
聽鋒車之召耳

某一生艱蹇晚節末路獨相公遇為至厚此恩此義某
蓋銘之心矣自相公去國既失所依而孤迹之危如燕

巢幕遠於廟堂雖幸全生而歸退念孤負相公頻年獎
拔成就之義此其愧負為無窮也然亦安知造物者不
為異時之地耳

上樞密宮使小簡

毛伯穎

春暉將杪恭惟燕衍琳宮神和道勝老成魁壘之舊海
內宗師神所鑒勞鈞候動止萬福謹具啟承候下執事
某官以道德文章為世儒宗遭時多艱請纓徇國威謀
知畧折衝萬里薦膺眷注入秉樞機正笏垂紳深謀遠

慮天下頌嘆更冀以時保練冲粹再膺贊列光輔王室
以究格天之業

伏以國步未夷士氣縮慙玩歲愒日偷合苟容某官以
英偉傑特之姿浩然直養之氣言論風旨頻伸顧盼有
識聳動皇天眷佑宗社休運勃興無競維人德望攸屬
豈宜久留閑勞均逸之地行聞備物典冊袞繡來歸當
軸處中以厭清議區區深切瞻嚮

某一介孱瑣人微位下無所短長於執事初乏葭莩鴻

毛之重繼以嚮風慕義切於衷素頃者輒以不腆之記
率爾自通於執記實恃某官蘊氣生風傑出流俗相士
以天機而遺其皮毛故敢進其區區果蒙不賜鄙夷垂
報教翰所以獎鑒整飭之至厚敢不鞠躬佩服勤勤勉
勵以無負一顧之重

某莫傳榜塵忝上舍及第流輪州縣垂三十年矣中間
備員揚州文館三忝郡寄而才力駑鈍觸事迂暗又不
能小廉曲謹恣睢抵擻以投合流俗之好惡棲遲凋郡

動遭讒謗頻致怨憎顧影跼蹐惴惴度日今冬滿更方
駕柴車歸屏田畝惟望某官登庸百揆數贊皇猷大鈞
所播品彙皆遂則此生寸進終累陶冶耳

某承先人緒業摩研編削苦心勞意於翰墨畦徑初無
所造某官以儒林宗匠為世模楷筆端膚寸流潤末學而
某斐然以其憔悴管蒯之質進於視聽乃蒙褒稱獎予形
於書牘竊用矜奮不啻見遇於大賢也韓文公有言身
在貧賤不為天下所知獨見遇於大賢乃可貴耳不圖

小子有此幸會謹以短啟少叙欣戴之素伏乞裁察

與侍制宮使小簡

夏序清和恭惟分秩祠庭樓冲業簡搢紳清言喁喁傾
屬神永相勞台候動止萬福未由侍杖屨更冀以道珍
練即膺寵數光裕吾道

自到眉山忽已踰歲雖累致問牘然吳蜀萬里江湖悠
緬浮沉未可知也某迂踈不能隨順流俗日困風波口
語無復佳况拱俟更滿歸偃林壑耳某官年兄尚淹閒

曠輿論未愜豈衰蹤蹇步砥礪附託亦自有時耶臨紙
重增悵惘

與侍郎官使小簡

仲夏毒熱伏惟燕申豐暇神明薦嘉鈞候萬福某竊食
行朝碌碌無補末由俯伏賓閣謹上狀記室某僭越皇
恐

敬問起居已具右副溥蒸在候調攝為宜敢乞為道自
重頤神養和以慰天下之所瞻仰

蹭蹬衰蹤素荷推挽戴恩戀德之誠頃刻不忘拜別崇階忽已累歲何緣得侍函丈少聆書紳之訓區區師慕飢渴莫喻

竊惟碩士元老德望藹然朝之羽儀上之體貌名遂身退士夫榮之方茲匏繫阻陪巾履企仰高風徒馳精爽
上觀文宮使小簡

問訊起居狀大畧如右即日秋暑恭惟琳館濠清天人交相鈞候萬福某蒙恩備員都司未由趨府引領南鄉

不勝欣慕之至謹勒叅候

某昨倅維揚偶從孔道出此邦黃緣得以望履繼此紛擾遂遠門墻即日不審鈞候何似暑氣未艾仰冀為廟社生靈保合太和前拜冊命以慰普天之望

某向自浙東航海以歸繼請祠館竄伏湖山殆與世隔無從訪便寓狀故冬竭來行在已聞相公被命將離長沙正恐道塗差池不敢輒具竿牘占叙區區之私某久荷眷知其心未嘗一日敢忘恩意伏惟鈞慈賜察幸甚

竊惟相公以承天事業為時英輔粵從長沙均逸而歸此中外所未喻也仰惟聖意趣鋒車之召濟中興之業行有詔矣獨是鄉曲之私日以企望

某遲暮不才去冬復塵郎省一毫無補坐待汰斥而誤恩踵至皆自相公平日知獎之賜匏繫於此無從伸一言之謝仰懷恩私第劇感激倘行在或有使令願効犬馬之力倘驅策之尤荷不鄙之德

宣撫 宣諭 總管 總領 茶馬 都督

上胡宣撫小簡

恭惟高牙大纛作屏殿邦夙夜忠勤神所勸相鈞候動
止萬福謹具啟承問下執事

伏以秦隴繹騷岷梁疲弊主上側席憂顧肆命重臣任
保釐分陝之寄恭惟某官以道德冠映簪紳疇咨僉同
誕膺典策天下幸甚一介孱陋辱在下風豈勝欣詠

某官德望之重峻極於天文律之高黼黻河漢固當誕
登袞繡以正鼎足承君之任主上方紹隆聖統恢復土

疆惟是四川最爾居吳會上流之勢藩垣倚注宜用一時賢業煩橐鞬鞭弭撫綏黎庶命書始下和氣穆然四川百域知所順勵敢冀保練冲和重副具瞻之望

川陝僻陋去輦轂下湖山繚絡路踰數千里某官建旄分閫轅門爰舍冒涉險阻不無少勞神明仰惟股肱之寄展盡忠力纓冠叱馭館穀次舍之間神明休勞百禄具宜某蓬藿賤士當獲布武堂下以備埽除之役下情無任竦企

伏以蜀地陬徼風聲氣習之陋無足比數然以朝廷德澤涵養之舊庠序衣冠畎畝陪隸粗知一心戮力出租賦奉期約今日某官以柱石大臣受任一方布宣德意唯是元元蚩蚩罔不委心展體以聽教條之下奔走承序敢盡布之伏惟幸察

某曩者備員渠川磨鉛策鈍粗免瘵曠繼蒙朝廷收錄改除眉州尋而叅政席公俾暫攝幕屬悠悠碌碌無一最一善俯仰羞愧方求罷居田舍待次茲者何幸當預門

闌卒吏瞻拜光儀不勝夙夜砢礪以幸一顧

上劉宣撫小簡

恭惟帷幄豐暇神人具宜鈞候動止萬福某仰承託節
制之尊未敢司敗無由侍見伏冀為國以道自重幸甚
某官道德文章九牧之人所共尊仰輕裘緩帶暫寬西
顧衮衣繡裳即佇東歸益祈與時御宜調順鼎食用副
天下之望

伏奉鈞翰念其流落疾病之餘恩意甚寵跪坐以讀殆

欲殞涕區區依歸傾向之心尚幸矜照

寶眷幾時可至府第下邑有驅役願受令

上吳宣撫小簡

秋序澄穆恭惟玉帳靖嚴威加塞外忠謀勇畧為國長
城神明寵綏鈞候動止萬福具啟承候起居

伏以四川百城生靈億萬自中原震擾封豕長蛇日夕
窺覘劬勞極力為之屏翰遂使元元蚩蚩仰事俯畜得
以安其田里保生樂業大功鉅德冠映今古區區孱眇

濯冠潔佩敢不惕在下風

某官以精忠勁氣為國虎臣親董六師鷹揚電掣遂使
敵人驚慄追奔遠塞保固疆場威望赫然伏冀為邦家
倚注之重念黎元仰戴之誠保練冲氣惠綏寵祿下情
瞻頌之至

某竊從搢紳之門每聞某官以豐功偉節傑出一代而能
降忠屈體賓禮寒士常願執鞭擁篲於士卒戎行之末
比者何幸獲修容於轅門之下躡履於油幕之前重蒙

謙光盛禮優待隆渥某委瑣齷齪曷能堪任但知銘佩
至意激昂衰氣庶幾稱塞萬分之一

某自遠錦城忽忽踰月偶以迎迓宣諭幕府事叢鞫躬奔
命日不暇給久不澡飾固陋諄復翰墨以致謝下執事竊恃
某官雄心大度不問微賤未貽譴斥敢率爾布之以幸悉察

上宣諭小簡

恭惟宣布多暇神明協相台候動止萬福某遠託恩庇
末由叅覲伏冀為國以道自重

不審比辰寢餽何如高名盛德九牧所知暫去禁庭遠
持華節恩言大布輿論交歡居報有期大用可必益冀
珍嗇以副中外之望

蜀非用武之國如孔明之賢其臨中原屢以糧餉不繼
而返今宿重兵餘十年聲勢隱然震於強敵將帥之建
功固高而民力屈矣某官以文章議論受上異眷臨遣
之旨實代予行國朝以來持節將命如富彥國之使河
北文寬夫之使河東韓稚圭之使陝西未有若此之重

者當有以大鎮撫之某將與州縣之吏重拜以賀區區
此心伏幸矜察

某為漢嘉踰年愛民戢吏艱勤儉約不敢具言易資中
到官未浹日適雨暘以時麥田甚美米斗至賤獄市不
擾內外無盜竊之虞民情甚安期有以上寬台抱憂卹
萬一故并論之

上總管小簡

朔律屆中寒凝方盛恭惟總戎多暇益載薦休台候興

居萬福某備員偏隅遠叨庇輝尚稽瞻對敢祈精毓天和別膺召擢謹具啟承候

謹時裁詞已列右番即此亞歲屆期陽施陰化伏惟英豪所履茂集殊休某拘縻郡事趨慶靡遑輒假緘封以見誠悃其為頌禱毫紙難殫

恭惟某官智畧邁倫雄才冠世暫總戎於屯戍克精練於師徒一路人民盡蒙綏鎮既威名之茂著宜眷倚之彌隆佇聞進位元戎策勳帝室以副輿人之望

上總領小簡

程子山

氣候漸熱仰惟使節在途雖有神明然妙護茵鼎以對
顯寵則又人士蘄嚮之誠所切拳拳焉敢以告於侍史
云

仰惟台座英規義槩冠冕多士固宜雍容禁闥翊贊昌
圖而乃斜飛遠引握節西來孰不憮然然六月不可不
息七月當來及今見之矣士為貴用政恐不免如台座
非耶

伏審陞華省郎總計邦財榮寵鼎來德威郵布甚盛甚
休惟台座清修博習聰明疏通凡時之緩急民之休戚
郡邑之虛實其無不察矣而以能為之才據可為之勢
如破竹如決水如轉圜石於千仞之山桑陰不移環蜀
數千里惠利霑洽以之更生豈待祠而祝哉少儲茂績
歸踐禁塗竊拱以俟

負罪脫死歸佐鄉邑已閱一歲且半矣既不敢薄其官
而漫畧不省亦不敢出其位而妄求乎竒唯是潔已救

過庶少贖於方來乃今台座將四路之使為二天之德
庇實窮途之大幸也然亦安敢恃而不恐以累知舊耶
惟高明裁察

自經憂患焚棄筆硯久矣短牋姑以見其悃誠非敢言
文倘不鄙吝上紆匠目幸甚

似聞舟御順流之臺府某一官有守無由亟從衣冠之
末少修贊慶之敬或者臨按少城得遂所願不勝大幸

上陳茶馬小簡

晁子西

涼秋至恭惟六轡行行原隰有光神明並相台候動止
萬福某敬遣一介以候前驅

邇日不審台用何如盛德所臨百靈自當呵禦不祥伏
想當此炎夏山川之氣皆効清涼更乞盡消息之方不
勝至請

天下之俗委靡不振久矣士大夫習於寬簡非君子剛
大之氣其孰能起之某得之搢紳之論以為今可望於
此者舍節下其誰哉蜀郡間風已皆有立志某獨恨所

被者狹耳何時曠然盡燹天下之俗耶拭目以俟

權牧之政蓋可以強兵而富國主上舉以屬之節下其
意深矣方此講好修睦正當閒暇之時便茶戶富實取
其饒以助給軍食出徼外之駿以佐卒乘為之數年恢
復之計成矣節下當擅此功天下幸甚

某流落遠方以貧所驅而冒處劇部欲罷不能重以積弊之
後府庫空虛賦入不及所出之半視事踰月茫然不知所圖
維當夙夜匪懈而已更望高明有以誨告之某之願也

上張都督小簡

仲春寢和恭惟坐鎮江陸運籌帷幄百神拱衛鈞候起
居萬福謹具公函仰塵記史

某審時之禮具載右紙不審邇辰鈞用何似仰惟盛德
所至神人交贊福祿駢集敢乞上為宗祊倍隆調護某
下情不勝虔禱之至

某比緣軍檄遂獲參拜款待約束曲荷恩光不以位貌
為間特加容接眄睐之私有逾於昔抑亦見大人君子

之心待遇門人之不替下情感戴雖刻骨銘肝未易敷叙

恭審恩自九天總臨諸將職兼兵柄位冠元戎名實所先華夷同慶某以猥職拘擥無緣再造鈞府以伸燕雀之誠輒具短啟申賀然詞語蕪類自取瀆尊仰恃恩慈有以矜恕

恭惟某官以道德詞章標映當世譽望之懿自宜謀謨天綽勵翼庶工丕昭格天之業暫膺眷注峻陟元戎方

將疇咨分陝之功光踐槐鼎以福寰海

安撫

上安撫丞相小簡

仲春令月恭惟玉節所臨列城風簞幽明協贊鈞候動
止萬福某拜手稽首敬裁柔訥申玷典籤

某申詞寒溫之儀不敢不肅邇辰不審鈞用何似恭惟
元勲碩德藩屏王家神相民依福祿繁衍更期忠調視
履宣節雨暘仰符當宁眷注之隆徇四海依歸之望

伏審榮膺帝綽雄殿侯藩詔書甫下於九天和氣已生
於列郡先聲所暨莫不交欣恭惟慶慰某屬以賤職拘
縻不獲迎拜道左輒藉毫楮以申燕賀之恭伏惟鈞慈
俯賜矜察

恭惟某官道全德備海內之所宗師深謀遠識夷夏之
所畏服名齊嵩岱勲耀鼎彝經綸之業宜在左右今茲
敷惠一路而帝心圖舊佇見敬求孚號旋頒復專國柄
均福天下蒼生延頸以俟

某疎逖庸微瞻望台躔不啻雲霄之間承言敬慕何可
弭忘廼今幸會鼎來忝與俗吏之末行將躬詣大府受
約束於下執事其為欣抃不能自言瞻望旌戟神爽飛
越

某學不聞道寸長無取繆當邑寄何補公家曠敗之虞
朝夕芒負今幸託庇於二天之下拳拳依嚮實切此心
倘蒙未賜罪逐誓當磨鉛策鈍期效補報之萬一仰乞
矜察

某不揆狂斐砌成短啟齋沐繕寫塵獻言語無類不足
道古今而譽盛德聊以見區區之誠耳倘蒙少霽霜威
一回電盼幸甚幸甚

上安撫丞相小簡

孟夏啟序恭惟偃藩容與神明耆德鈞候動止萬福某
謹齋沐奏記仰瀆司事伏乞鈞察

謹時申詢右幅已肅適辰不審鈞用何似敬惟盛德所
臨密有扶持景福潛介視履元吉清和在候更乞上律

天時俯遵月令葆練冲粹仰副隆委某卑情無任虔禱
伏審某官清用剛辰肇開藩府吏民交慶規制鼎新恭
惟歡慶某忝與屬吏固當俯伏鈞墀伸賀伏聽鈞旨遣
還賤局間命奔走即抵下邑謹具手訥敬布燕雀之誠
伏乞鈞察

恭惟某官奧學洞古今浩氣塞天地逢辰致生佐命中
興元勳碩德輝映青史燧乎盛哉故雖均逸祠庭中外
繫望欽想簡注愈隆暫屈蕃宣之寄自頻而中復正台

司益茂賢業以侈社稷無疆之休天下幸甚

某一介寒微夙萌願見之心伏承玉節鼎臨迎拜道左獲
修屬吏之敬黃緣幸會慰喜無窮念自拜遠鈞墀復經
旬浹瞻望旌戟邈在雲漢伏楮凝戀神爽飛越

某才學踈謬濫司百里歲糜月費亡補縣官雖去替之
期僅存半載朝夕凜凜若何為善後計仰冀二天覆護
未賜譴斥誓當益加勉勵求稱使令訴情瀆尊死有餘
罪伏乞鈞亮

某不避僭躐之罪敬申鈞閱瀛眷安問伏惟履茲初夏
內外駢擁自天之佑下邑恐有驅使事件乞鈞旨行下

上汪安撫小簡

庚辛處躔恭惟高牙在行神明護相台候動止萬福某
敬遣一介詣節下

比來不省台用何如益昌地接秦隴會當早寒計已授
衣遂御功裘更冀無犯風霜保合太和區區以為請

節下之治蜀蜀人皆歌舞其賜常願赤烏之留如韋南

康公坐至中書令位冠廷臣其如霖雨之施局於一方使天下不被其澤庶聖上行當召公矣

杖鉞臨此四道蓋三年矣計其勤勞論其見效宜歸秉魁柄乃為稱耳今茲制頒下領昭陵之圖書地近職崇以示光寵蓋不欲奪蜀人之廕庥故也某敢不為蜀人賀

某按刑茲部亦復期年而司存實近蠻徼向來諸公居此極岌岌今乃得無事飽食者公來雪山重耳幸甚幸

甚

上安撫小簡

仲夏毒熱伏惟鎮撫豐暇神明薦嘉鈞候萬福某竊食
行朝碌碌無補末由俯伏賓閱謹上記室其僭易震恐
詢問起居已具右幅溥蒸在候天令不常伏乞特為宗
社妙嗇冲和以副九重眷倚之重

曩者參政當朝進退郡吏某備數省曹參謀相府實出
鈞化自違節麾三更歲籥時事多艱塊處里閤不敢時

以私書干溷聽覽惟是瞻企門闌不勝駑馬戀軒之誠
仰惟參政盛德元勛中外具瞻宜在廊廟康濟天下方
面均逸久鬱輿情匪朝伊夕當膺環召正位鈞衡以快
士夫之望

比自祠宮召寘省曹方愧叨冒復被誤恩為屬樞府皆
自平時推獎之賜第慙空疎初無一得之慮贊畫宥宥
日以憂懼尚賴洪庇或逃官諉幸甚

上安撫小簡

恭惟燕及列城神明薦祉鈞候動止萬福某賴洪庇如
昨末由趨侍拳拳門墻不勝燕雀之誠

故冬乘便寓狀記室竊謂僭率已在謹訶之下寬德遠
量既畧濶之復肆誨報所以存獎慰藉甚寵仰佩謙眷
淪浹肌骨即日不審鈞用何如暑氣正酷敢祈上為廟
社對時節宣竚膺魁柄以慰普天之望

竊惟某官行孔孟之道致臯夔之業器識之遠政事之
妙宜居廟堂共濟中興出殿大邦亦既踰年側聞公議

謂頒詔趨歸侍冕旒而參帷幄蓋旦暮事也某當隸屬
之末尤切悚望

某待罪計都已慙非據而宥密之地平生夢想所不敢
到遽以叨冒遲暮之年實出參政從來鈞陶之賜某獨
隔濶無從占叙感激之私惟誓頂踵圖報萬一神實臨
之非敢妄也

上安撫小簡

暑伏歆熾恭惟保釐綏馭說禮樂而敦詩書方面隱然

有金城之重神理相勞戩穀具綏台候動止萬福謹具
手啟上塵記室

某官翱翔禁橐風華素履冠映搢紳其於論思獻納見
遠識微之明固主上所前席而思當饋而嘆也登延贊
列歸輔台鼎即在朝夕更乞殮稟太和益強體素行對
寵渥下情虔頌

比嘗率爾具竿牘自惟擊轅拊缶悴音曲節浼瀆至聽
宜蒙譴斥然某官寬隆盡下獎鑒多士清襟所照每賜

酬酢箱篋几杖之間金石隱鉉警策寒陋一何榮幸

某一介凡窳備員部內固未嘗得戎衣冠奉杖屨奔走
使令於前恭惟某官樂育仁心兼收並蓄齒牙餘論激
揚寒素初無牖間一面之雅獨取堂下片言盱衡推轂
特形論薦凡材下乘頓增光價敢不勉強衰拙庶幾於
任重致遠無忝題目區區鄙悰不勝銘藏荷戴之至

某猥蒙知遇置在藥籠之末恭惟某官以儒林宗匠受
任方伯風裁高峻蔚為今世龍門而沉淪蹇頓濫被品

目岷峨人士聳然改觀實深榮幸謹具短啟小道謝悃
伏望燕閒之隙一賜觀采

上安撫小簡

暑雨蒸潤恭惟耆英鉅德為國藩垣保釐督護之功百
城順賴神用顯相台候動止萬福謹具啟承候下執事
某官以簪紳素望冠映甘泉侍從之榮嘉謀嘉猷海內
稱頌方當策勳序爵翊贊鼎槐而當寧憂顧岷隩暫繫
鎮撫恭惟元戎十乘殿天子之邦億萬羣黎性命攸仰

伏冀保練冲粹精護寢興垂副瞻頌

某官伸謹侯度布宣王靈所下教條無非惻怛忠厚之
實立經陳紀禁暴律貪風尚凜然令行禁止休聲協氣
薰顙太和雨暘以時嘉生芄茂某辱在部吏得疊疊怵
惕恪恭於繩矩之末顧不幸甚

某比者不自揆度輒作骯骯之文仰干繩削某官以儒
林軌匠運斤成風膏馥之餘不我遐棄特捐書教褒稱
獎與許以竒古之目愧非顏淵附驥尾而行益顯感嘆

奮激不勝下情昔韓文公有言愈之所以志於古者不
惟其辭之好好其道焉爾短章悴句摩研編削之陋既
辱稱予敢不益思溫尋研推淬濯砥礪庶幾乎言之必
可行無負崇邁世教之厚德也

特蒙某官垂貺齊酎十壺仰承台眷拜受感悚恭惟荆
州平一之惠建康清醇之德所以飲食教載示其仁心
者厚矣敢不屬饜盛德銘諸肝膈

某蹉跎蹇步頓迹塵瑤備員部下當物衆人夥政煩賦

重之際刻肌刻骨攻苦食淡無所云補每用愧嘆伏遇
某官以篤實輝光之盛德憎服郡吏獎鑒風材蔚為一
世之龍門而念此孤蹤自維揚入館三忝郡寄粗無瘳
曠今當闕陞正任資序願與牛溲馬勃雞壅豨苓為藥
中一物以階寸進猥蒙矜念許賜收錄區區不勝彈冠
振衣三浴三薰以俟齒牙之論也

上安撫小簡

仲秋謹時恭惟坐鎮侯藩撫綏多暇百神森衛台候動

止萬福某遙望旌戟行有瞻拜之幸下情預切欣愉謹
具啟上塵記府

申問之禮不敢以微賤自廢具如右副維時玉律方中
涼颼應候不審邇辰台候何似恭惟分閫所寄恩威並
暢軌躅靖謐福祿駢臻更乞精練冲養即膺節旄之拜
魯宗頌祝倍切拳拳

疎逖一介竊服威名德望積有日矣第以隨牒南北無
緣瞻拜履烏惟是區區願事鞭勒之心耿耿不泯何期

幸會行奉台符於指顧之末下情不勝榮慰之極

恭以某官元勲盛德久屬朝野之望經緯大畧夙簡主
知強敵未殄朝廷側席優賢以圖恢拓掃除氛祲寧濟
宇宙翼戴王室非公而誰興議如斯非敢為佞

竊以中正大邦實右都國之會方此還定安集之初某
官仰體眷隆肅加鎮撫威惠並行羣凶屏息苛慝不作
百姓寧福元功卓越前無古人嘉命顯書進秉樞筦折
衝廟堂之上期在朝夕

某猥瑣庸流叨塵仕版再調銓部獲司曹掾遂以么麼
趨事麾下天與之幸感愧參集行將斂板公庭瞻望慕
府當竭疲駑用副鞭策下情欣抃之至

上安撫小簡

仲冬寒凜伏惟偃藩多暇天人協相鈞候動止萬福某
仰託悻蒙末由俯伏鈞屏謹奉啟申候起居

上問約履謹載右楮陽氣始萌伏惟順乘令序第祿蕃
行某拘轡不獲旅進階符稱慶伏乞上體眷懷精調獲

寢倍保鈞重至深祝望

迺者伏審某官均佚機務來牧要藩列城間風莫不胥
悅某既無緣負弩少展望塵之禮復不敢坐通尺牘干
浼嚴重輒因新節聊述卑悰伏惟鈞慈特賜矜察

仰惟某官蚤以真儒擢居元輔當國步艱難之際奮然
以忠義自許不避險阻四海之內蒙被嘉澤幾年於茲
元勳舊德謂宜來佐王室與宗社同休倚需節名還秉
國鈞以慰蒼生之望

竊承河南郡縣悉歸版圖中興之功誠日月可冀所賴
黃閣疇庸緝熙帝載俾寸地尺天皆入貢籍然後仰副
聖主憂勤之意某官任隆柱石茂績殊勲竹帛難紀禾
穎同秀衮衣東歸在此時矣搢紳喁喁非獨辱品所敢
諛也

某蚤遊賢闕齏鹽十載偶獲綴相公榜末是時雖不及
叅識於稠人中瞻望風采昂昂若雞羣之鶴決知非池
中物也伏自相公當軸陶冶天下士類獨某以不才之

資無階可備器使賦分淺薄夫復何言引脰釣閭徒增
惓惓

五百家播芳大全文粹卷五十九

欽定四庫全書

五百家播芳大全文粹卷六十

宋 魏齊賢

葉 蔡同輯

疊幅

漕使

上漕使小簡

晁子西

區區參訊已列右記即日仰惟清心肅物有神自相台

候動止萬福某謹再勒副上承

仰惟吉德君子所至如和氣祥雲品物為之悅茂而某
獨熒然憊矣得公之來濯濯遂有寬裕之意然高文大
手當施之北門西掖豈久淹於此乎丘林之累尚為公
一增氣也

傾因迓吏草創上狀蓋念世間陽尊浮禮非所以事長
者而又自間使旌壓境其間人也若將遑遑然與負弩
之吏竿牘爭先則公亦將鄙之矣故有所待而後講乃

蒙高義不忘首賜牋記褒借甚寵下情愧忤重以自咎
尚惟寬明有以原照幸甚

蜀士多文采其學業其志節足以與古人相上下者蓋
亦有之但生長遐陋張張無所統盟程能定價使之依以
揚聲而補於世用則公當任此重也某老矣百念灰冷
唯於人物猶有莫助之愛敢竊以私於下執事區區唯
所財幸

門下尊少伏惟均介盛福某焚棄筆硯久矣偶作小記

漫遣呈上亦足見其憂患廢學如此耳併師相生辰詩五
首往干一觀

上漕使小簡

時維季夏熾以景炎恭惟攬轡云初臺綱靖肅神亦欣
相台候動止萬福某拜手稽首敬裁手訥仰塵典籤
申問之儀已列彝式比辰不審台用何似仰惟澄清一
路調度有經神之聽之福祿蕃衍更祈勉懷體貌珍護
衽餐行膺拜顯以叶中外之望

伏審某官榮被宸恩肅將指使涓日之剛已諧視事恭
惟慶慰某屬邑下吏喜尤倍於常人敢著裁短啟別緘
伸燕雀賀厦之私伏幸台慈特賜省察

恭惟某官望隆朝野識練古今夙被眷知薦揚聲實固
宜密勿禁庭朝夕獻納輔成至治以福天下閩陬何幸
兩私大惠第恐坐席未煖環召鼎來入拜制麻垂副公
議

去春拜違台表屈指年餘拳拳尊敬頃刻食息不敢少

忘唯是遠隔不及時貢記室之問迹雖似懈情實不然
茲者伏承玉節載臨某自惟疵陋一何天幸又獲仰事
賢使者况柔梓晚進計未終棄瞻望台躔不勝依向之
誠尺紙寸毫莫究萬一

某愚不省事繆當邑寄曠敗之虞旦旦凜然亡何絃更
善後之圖未知攸措仰惟厚德君子矜憐寒進周旋覆
調不以罪行而莫大之恩當銘於子孫肺腑矣在冀台
念

使闕仙眷敬惟履茲庚暑中外駢擁龐鴻之祉下邑恐
有驅委乞賜台戒願殫爲鈍之誠

上漕使小簡

仲夏謹月伏惟繡斧光華臺綱增重神示贊襄台候動
止萬福某代匱下邑仰承蔭樾末由趨拜履約謹齋沐
具狀干溷輿隸以聽伏乞台察

申之茵鼎恪載前記未審適辰台候復奚若恭惟玉節
載臨澄清有道天下威助固宜福祉之川至也敢以上

為廟朝加必饗寢晉膺柄用益懋康濟之圖為天下請
恭審某官榮拜宸恩肅將使指先聲士庶交欣涓日之
剛已諧登攬某叨與屬吏喜倍等夷限守官箴阻迎道
左謹具短啟別緘伸燕雀之賀伏紙瞻依神爽飛越
恭惟某官以大雅之資至剛之氣淵源學問追配古人
餘事文章度越今世結知丹扆入踐禁途屬時清明尤
重外臺耳目之寄妙簡朝望暫屈我公登車方初列城
風聳元元仰惠抑何幸與然竒謀妙蘊素攄究於廟堂

政恐坐席未溫揭甌環召入拜制麻區區偏方詎能久
淹耶輿論誠然非敢諛貢

某卑冗寒微佩服山斗之望多歷年所雲泥異蹟不獲
一拜台光永言敬慕鑒昧不忘伏承肇開臺治而某備
員支邑忝屬提封獲叨庇休於景星慶雲之下瞻望企
仰私自語幸實何異於親侍熒煌之席也歸依彌勒毫
楮莫既

某曩自叨竊末第強顏入仕一紀有餘屬以偏親之養

覬竊寸祿得邑海瀕行書一考自惟孱陋學不見道以
之從政曠官之責將何以為善後計茲幸賢德鼎來奉
教戒叮嚀有日矣誓當勉勵厥職恭承嘉惠磨鉢策蹇
期效寸長於屬吏之末倘蒙台慈矜其不逮而使免於
戾豈勝厚幸俯伏陳露尚祈台察某一介疏遠不敢僭
申竊慕上下靖共之義下邑恐有使令乞台旨行下

上漕使小簡

秋霖淒腓恭惟祇命辦嚴輜軒繡谷光華原隰台候動

止萬福謹具狀承候下執事

某官勲勞德業簡在宸衷銜恤之久上心倚注每隆無
替是以祥除之始誕錫嘉命以數路百城焜煌旌節庸
示委屬竚聞錫環之詔歸主論思荷橐之選乃慰清議
違去誨席之久自春間一致問牘尋辱裁報翰墨款曲
之間仰紉恩意自爾吏事倥傯久踈遣省企仰惟愛子
宿素未貽剪棄吏組拘縻尚未能趨伏門屏敢冀保練
冲粹懋膺晉渥垂副願頌

上漕使生日小簡

季冬謹月候恭惟漕臺飛輓廉晝優閑靖共神相台候
燕興萬福某遠託恩覆未由瞻拜台光謹具啟申詞記
府

仰候起居之禮粗陳梗槩適辰未審台履復如何欽惟
澄按多暇神物交佚茂介殊祉歲聿向莫寒氣益隆敢
祈上體眷懷妙毓崇粹以俟晉擢下慰拳拳之禱

九冬幾滿氣候將周乃某官降辰穀旦伏惟元精所作

稟質特異仁性符於愛日剛德協於嚴辰出為英傑以
佐昌期實自穹靈之默相福作壽齡固將與宗廟社稷
並其久長非管窺蠡測所能知其極也

某官德宇高明性天夷粹自妙齡馳英聲膺柄用勲名節
操顯顯在人耳目自非大昴應時列星間世何以臻此
宜其亟登禁垣旋陟台輔以快士鄉之評尚淹漕寄未
愜輿情佇聆鋒車促召以究遠猷門下小子尤切傾俟
恭以夢熊吉日得罄良辰摺紳士夫交歡善頌誠由恩

輝義槩有以感物激人故拊蹈之至不謀而同矧如疵
陋之迹早蒙陶冶復有賴於生成其為傾仰當如何哉
限拘官守不克趨廁稱觴之列謹具短啟以露微誠仰
祈煥察

某屏四方久遠牆仞感恩戀德之心無時或替前此欽聞
攬轡之始嘗具柔牘馳慶幸遂塵徹焚席每惟雲泥勢
邈不敢頻拜尺書恭逢誕日復爾僭易修貢兼以妙香
功德品目專人賁獻台墀用伸記誦輕越之罪敢覲恕

原

某微瑣凡材夙叨品題遂徵簡數一同常思勤劬曲謹
以免瘵曠庶無辱於恩門茲緣天幸復藉提封之庇豈
勝欣戴更慚盛德包容始終獎拂俾益安於賤職以再
入於鑪錘實甗生之至願依歸傾跂毫楮難殫

上運使小簡

槐序氣炎伏惟攬轡入境神相循行台候動止萬福某
敬遣一介候詣境上

適日不省台用何如伏惟乘傳而來雖當盛暑玉節所
至肅然風清自應不知煩鬱也更祈厚自持養以副巡
屬之望

伏以某官風度英秀粹然如圭璧宜薦天地宜在清廟
不謂乃爾久使於外雖一方受賜矣其若不稱何佇觀
璽召之至

峽內地褊小無甚劇事殆不足以展大才所謂太阿龍
泉匣內藏之識者所惜也近省制誥改臨益部聖主蓋

亦知之矣此方正議除虛額之調未能即副上意其有待於節下願言疾驅

某本不任為郡如得事忠厚之長以保持之則可耳向在梁山微節下之賜其何能免於戾耶既來此部猶一萍之託茫然之水日夕惴恐忽聞軺車當來喜不可言不覺欣然起舞也某更卜告朔亦去矣預恨窮薄又如往時不得久庇豪士之大廈也

申問記史已具右幅季夏謹時恭惟澄按豐暇神衛忠功

台候動止萬福某蒙此如昨未由趨侍南向拳拳不勝
犬馬之戀謹勒參候不備

某一介之賤乃得以執事受察節下側聞涓擇剛辰已
諧禮上賤職奔馳未遑斂板一望台光伸萬一之賀仰
慕威重朝夕以之

即日不審台候何似諒惟列城蒙休動履百順坐致殊
祥炎涼未即敢乞妙嗇沖和益綏壽嘏拱俟詔除以副
中外之望

某屬者輒犯分義卒然具咫尺之書塵溷記室少伸燕
雀之賀不審嘗徹台聽某職事係在蘇常江陰三州往
來幹辦以故未獲伏詣使臺下情悚懼伏惟神明矜察
幸甚

竊以少卿學術才具上副眷知下車未久績烈已著一
路士民孰不鼓舞被翁鬱之澤第恐進陟禁近行有詔
矣輿誦屬焉非敢為佞

上運使小簡

歲籥肇新恭惟某官澄按豐餘天人介相台候動止萬福某凝睇星臺未卜瞻覲謹修柔訥仰干下吏之聽

申詞興居已塵管記適辰獻歲發春不審台履復何似仰惟觀省風謠列城僊頌履端之始百順來宜更祈上體眷懷增愍茵鼎佇聽促還以慰搢紳之望

仰惟聖天子所以坐享隆平者皆以外臺得人政流民悅之所致也當是之時某官以上所簡注出擁皇華其寬大和厚之氣薰被黎庶坐使列郡之民熙熙然如舞

春風而飲醇酎可謂不負委任責成之意矣然一路何
足以私大惠必將接武禁林垂光雲漢使六合內外均
被其賜然後足以究其施設也士論所歸非敢為佞
屬者進伏台墀既辱燕見於賓客之末且蒙畧去威重
兩使侍食慰以溫言所以教督而寵藉之者雖父兄之
於子弟不若也自惟一介微陋何以得此佩服撝謙有
言莫喻自述遠光儀忽忽閱歲嬰犢之慕已劇於中何
當再逢望履以罄欲言臨紙朔風恨無飛肉

上運使小簡

中冬寒凝伏惟攬轡澄清臺網振肅神明扶佑台候動
止萬福某延望旒麾未期參覲謹奉狀仰承饗寢伏乞

鑒察

申問之儀已具右紙即日不審台用何似伏惟下車伊
始風化班宣戩穀有慶寒氣已嚴更祈上為清朝葆毓
冲粹別膺異數下情無任虔叩

恭審光被綸言總司漕計比休所暨欣抃攸同某屬賤

役拘縻無階旅進稱賀凝望輜軒精爽飛越

仰惟某官碩德重望著於朝端蚤被簡求周旋省寺休
譽赫然孰不歸仰謂宜論思帝所日侍清光尚且擁節
外臺殊拂輿議佇聆嚴召促還禁從光輔王室用紓中
外之望

南閩遠部三屈使華伏想輶車入境老壯歡呼深仁善
政遺愛在民去思之詠幾年於茲一旦重駢四牡再沐恩
波人心慰愜當如何哉第恐聖主圖任舊德不容久駐

此非下吏私切欣嚮實措紳之所同也

某頃年備員合沙數獲仰瞻履舄重蒙獎借銘篆肺腑
豈有窮極拜違台範閱歲滋久冗賤孤蹤不敢坐通記
府之問每於邸報時見遷擢亦足慰景慕之心然賢業
素學未盡發揮更願涵養以需天寵至深瞻祝

上漕使冬小簡

冬深寒仲伏惟秉心宣猷臺綱振肅神明胥贊台候動
止萬福某竊祿無狀政賴幷蒙未遂叅拜謹奉啟起居

仰乞台察

申賀之誠謹具右記即辰不審台候何似歲華向晚敢
祈上為明時惠序珍毓前席晉拜某虔禱

一陽來復品彙潛萌恭惟對此令辰導迎協氣茂擁蕃
禧某限文撿阻造台堦稱賀傾頌之誠但深馳仰恭惟
某官聲實卓越久著朝端伏自澄按屬部恩威浹洽罔
不震肅竊承睿眷方隆計司之任恐難久淹佇膺嚴召
亟濟華要發揮大業以慰人望

比嘗具狀上塵記府既而不果薦貢柔訥誠恐冒瀆台
嚴固非懶慢仰惟寬明特賜矜察

某一介凡瑣備數下邑雖效職寢久而空食罔功第切
驚惕伏望台慈更垂保庇尚當自竭以副驅策

提刑

上提刑小簡

仲夏謹月恭惟繡斧光華臺網靖謐神亦左右台候動
止萬福某承乏下邑仰託雲庥末由瞻侍謹具啟上塵

記府邇辰不審台用何似欽惟玉節載臨澄清有道休
祥駢集密有扶持梅暑鬱蒸更乞上為朝家加念鼎第
前膺召拜

恭惟某官挺不世資負過人畧其談笑餘暇足以剴治
煩劇其動靜俄頃足以建事立功誠可謂難得之才萬
夫之望也况當大有為之主夢想人傑力圖恢復有如
執事固已簡在帝心外臺祥刑之寄姑推借重政恐不
待席煖突黔而詔音頒矣區區賀誠謹此筆以俟

某祇服台望非一朝夕恨以沉冗不獲瞻拜鈞座承言
敬慕鑿寐不忘茲承肇開臺府而某備員支邑忝屬提
封獲與使令之末其為慰何可比量尺紕寸毫莫究萬
一

上提刑小簡

劉夷叔

序氣向暄即日不審台用何似某承乏歲事日與門人
講論德業以次傳授無由趨侍不勝企仰區區奉啟
使節初蒞已福遠人巴神楚鬼預有憑附伏惟下車以

來寢膳安吉起居輕利益副遠近傾屬之心某在門下
區區不任大厦

近者方得以書致賀敬布腹心述其所以不敏之故意
謂必獲誅絕將命者反迺蒙寵以報章然後益愧向者
窺量君子之淺傳播士類咸謂盛德包荒乃至於此人
之愛服敢再拜告諸執事遞中伏領公牒蒙被保任皇
恐死罪伏念某以薄技誤蒙收拾不惜語言粉飾薦道
向者當塗貴人所以寵異惟公之故此心惘惘常不相

忘未知所以報塞君之大貺玷朽重任懼將壓焉小人
無路報德惟知自修不負所期而已不識執事以為可
否

平生憂患如籠中鳥久被閉繫無復飛想門下親臨其
旁顧瞻嘆息如有憐而出之之意其竊以振勵庶幾求
出情之悃幅因此發露伏惟不以小人為不可近而遂
親之幸甚

上憲使小簡

趙元鎮

冬季謹時恭惟登覽之初神人扶相台候動止萬福某
竊食部封仰依覆護未由瞻覲謹具啟干溷輿隸之聽
伏乞台察

偵候威嚴具如右削不審邇辰歲晏嚴寒台履何似恭
惟玉節載臨至和來宅敢乞嚴護精神葆嗇台重慰天
下朝夕之望

恭審某官蒙拜新恩肅將使指先聲所暨士庶交欣涓
日之剛已諧視事恭惟慶慰某自聆成命忻喜倍於常

人敢著裁短啟別緘申燕雀賀厦之私伏幸台慈特賜
省錄

某官天資傑特地胄高華兩宮之眷方隆四姓之侯莫
比果膺一命禮畀以祥刑顧方今練達之材疏通之政
以某觀之未有如閣下者而翰旋樞極調變元化總天
下本兵之寄非公尚誰望耶第恐坐席未煖環召鼎來
入拜制麻垂副公議

伏自今春下違遠之拜屈指數月漸見歲換拳拳尊敬

頃刻食息不敢或忘唯是遠隔不及時貢記府之問迹
雖似懈情實不然自邸報初傳知有持節江東之命某
自惟衰晚一何天幸又獲仰事賢使者況門墻舊物計
未終棄朝夕引領但未有趨拜之便少叙下悰睇望使
星心精馳驚伏冀台照

某備數於此已書一考有竒冗食素餐幸無吏責祇益
自愧來春先次搬挈碎累歸於長樂旋為趨朝之計庶
幾密邇河海千里之潤旌旄按臨屬部諒在匪遙首當

同壓境之初先衆人而郊迎以盡區區之恭情之欲言
非筆舌之所能既惟台慈有以諒之國太夫人即日恭
惟百順駢臻五福寧謐

台眷上下一一茂集休祥有委使乞賜台旨

上憲使小簡

區區叅省已列右牋即日仰惟舟御所臨有神伏審台
候萬福謹再勒副布下執事

天方暑雖江流奔壯放溜容與想甚慰愜尚冀精御粹

冲以副願望至禱

西川劇部蓋冠前蜀而嘉陽江山雄傑呈露雖不及吳越之清遠然在叢爾國實冠諸郡也臺府高明宏麗甲于成都君子一臨益增重矣

眉山蓋在天之末也台座宜翱翔臺省乃今擁節實辱臨之而已老窮交豈謂得與父老子弟爭先覩於鄉國乎曷勝大幸

上憲使小簡

張安國

暮春之初天朗氣清伏惟秉節東都神相吉德台候萬
福某謹勒啟上呈記室

稽違天表忽閱歲時跂慕老成夙夜拳拳比辰不審外
台暇日履用復何似敢祈上體眷懷視時御宜亟膺驛
召入對嚴陞區區至禱

嶺海之間民夷雜居彊悍成俗喜鬪健訟一以吹噓撫
摩則有根莠之害一以苗薈發櫛則有獄市之擾必得
忠厚明允之士寬威兼濟以變和之故上以節授執事

俾定欽恤奉使稱旨即日顯褒鋒車促還冀遂先覩餘
惟為民自重

上趙提刑小簡

春寒恭惟外臺豐暇神明協相台候動止萬福某近託
大庇末由叅覲伏冀為國自重

不審寢饋比復何如同姓之卿宜歸本朝以衛王室尚
祈珍晉前趨名驛

某瞻仰名德之重於茲有年比者待罪下邑遠獲恭事

威嚴幸甚何當一詣帳下親受約束臨書不勝欣幸之至

上憲使小簡

氣候凝寒伏惟聳鎮百城神明扶佑台候動止萬福某
遠藉熒輝未以罪斥尚阻趨伏墻仞手具謹啟叅候
候問台嚴謹如右副陽律方新純剛寢長恭惟履茲令
序戩穀實繁某拘縻無由捧觴稱慶伏冀愛嗇神粹永
諧魯史俾熾之禱

迺者伏承星軺臨按遂獲瞻望符采殊慰疇昔仰德之
誠拜遠台光遽閱兩月內擁勞結不可具言更乞共隆
賢業前需峻名以慰中外願望

仰惟某官聲迹卓越妙簡淵衷澄清屬部已逾朞月平
反獄訟絕無寬濫真足以仰副欽恤之意憲臺雖極嚴
峻恐難久淹竚膺異數以安輿論

某備數百里職事曠敗分甘汰斥前日飛駟按行特蒙
寬宥未賜威責不敏之資顧何以論報唯銘鏤肺腑誓

不忘德姑此申謝萬一

上憲使小簡

欽服威重有年於茲雲泥之隔無階趨就下風惟其注
仰不忘旦暮天假之幸乃使密依虎節平昔願見將就
慰釋千百欣愜無以借况伏承簡在淵衷榮司外憲涓
日之吉已開盛府裁剖伊始狂獄一清自淮而右綿地
數千里如在冰鑑中顧屬吏所以歸賴宜如何也薄宦
匏繫趨賀無從引領使星但劇善頌


仰惟某官偉望嘉績凌厲一時歷金門上玉堂士心慚
向久矣尚茲弭節蓋清朝用賢之漸匪伊嚴召即踐槐
鼎霈然霖雨以福蒼生某雖孱陋庶及霑焉得之師言
非敢為佞

旌旆至臺亦既旬浹凡在悒悒之下宜奔走階祀以承
戒約小官有守不敢輒望台閣懈怠非所欲為仁明必
推情恕不然則孤外之迹奚能少安耶

黃緣寸祿獲依麾戟筮仕荒陋豈敢逃責惟王公大人

教其未至而貸其不及使遂黽勉歲月不為親憂丘山之賜顧易量耶近仰門闈倍萬眷眷

下邑雖僻民訴實繁偶歲屢豐寇攘不作訟銘因亦簡虛駕鈍無堪少逃官謗皆仁施所暨也幸甚幸甚



五百家播芳大全文粹卷六十

欽定四庫全書

集部

五百家播芳大全文粹卷六十一

詳校官侍郎_臣劉躍雲

助教_臣常循覆勘

總校官編修_臣王燕緒

校對官中書_臣李荃

謄錄監生_臣徐紹域

欽定四庫全書

五百家播芳大全文粹卷六十一

宋 魏齊賢

葉 棻同輯

叠幅

憲使

上提刑小簡

張安國

伏省旄節按行巡屬當此盛夏敢問跋涉不至勞乎恭

惟拳唯問俗神明喜相風伯獻涼不知煩暑台候動止
萬福某進一介以候車塵

某聞諸部內之民思仰盛德朝夕願見不啻當暑而思
濯清風忽聞使軺近止上下延頸不勝喁喁

此月正是土潤溽暑之時居爽境者猶懼煩熱伏聞輜
車犯此炎天慮有淹繫蓋仁人之用心闔境嘆息不知
所報惟冀戴星而行日出而舍以避道暘不勝拳拳之請
某迂疎不勝一郡之寄而復視事日淺州綱頽壞多矣

遽承節下按臨為之悸恐望台慈有以教其未達而寬
其不逮幸甚

上憲使小簡

叙慶如右牘獻歲發春適日興寢何似恭惟茂對佳辰
天相清德福祿來臻某蒙仁育素得追吏未期叅省願
言葆練粹和亟還禁從用快朝野頌禱之勤伏紙眷眷
伏承台誨見親瞻遡光輝日益悃悵比僭具記計塵
几格恩瀆之罪未賜譴斥引領東望不勝感荷

伏念門生故吏所以事貴事賢之禮載於竿牘乃分之
宜鉅公要人未聞與之往返講好若僚友然也過蒙謙
尊略去畦畛誨答開諭周旋跪讀感慙曷已尚稽面謝
無任歸依

小往大來君子道長仰惟吉履綽有休嘉一官冗曹阻
陪賀客千百善頌拙喻毫紙

春光布澤明天子擢進髦乂時也時望之偉首當遴東
徑踐華實匪朝伊夕以其彙征門下士猶有望焉區區

此情竊為之喜近江賊就擒幾無雠類威令素行羣下
用命其效政應如此繼自茲善良得怙恃而庸懦亦自
免官謗顧喜且幸可勝道哉感刻

上提刑小簡

林豈塵

詞候寶寢敬遵彝式具列首牘比辰春事融悅化日舒
遲不審台用何似竊惟澄清豐暇神贊人詠冲襟泰定
戩穀日隆尚願仰體宸睠茵鼎密護倚需賜環進陟鈞
軸下情肫禱激切之至

某夙望台符自惟寡昧無由進侍光躔朝夕第勤景仰
茲以試邑獲隸部封遂託輝映職守所拘尚阻叅覲遠
企熒煌精爽飛越

恭以某官雄名蓋代峻德高古雖為禁路羽儀南宮眉
目文章事業未及施用上方以外臺為重皇華之遣政
藉諏訪而埋輪攬轡姑息威譽行需走節趣覲清光遂
膺柄用以福寰海

某羞抗塵容掌獨山邑初至承前未知深淺然簿書米

鹽不憚煩碎百里休戚首當訪問至於奉遵科教頒揚
明令敢不期勉以承德意猶懼駕蹇未逮尚賴寬假轡
策庶幾驅馳竭力不至顛濟以速罪戾密控慈明敢斷

宥咎

某竚績效知深虞簡率上貽嚴遣晚學寡昧不敢揚文
露志輒以短啟畧叙卑僚仰瀆高明戰慄俟罪敢冀台
慈特賜省覽

某十六年太學齋鹽晚竊一第今一紀矣茲以試宰山

澗未免面墻之責所幸事大君子敬受警誨庶幾讀書
鳴絃不為俗吏之歸尚蘄清鑒特與矜念

上提刑小簡

比日秋氣恭惟弭節之初德威所臨百城聳震台候起
居萬福某待罪敝邑無從埽舍人之門上叅典謁益冀
為國以道自重

公之結上眷與上之遇公者大夫士共嘆千載一時之
事不知其有所自也某獨知之蓋以公之道德文章有

以深結主知惟不少留翰墨深嚴之地悵然耳今者使
華所臨人心歸之頗有暇日追尋昔游見於文字否何
當往繼後車賓客之塵臨書重增馳向惠龍茶松煤佳
品獨恨寶丹妙香新勝不同下拜也此外不敢望公如
陸生以所賜黃金分故人耳一笑皇極書數十萬言未
易辨觀物二篇先君子為之傳并褒德下感二書同致
几下尚先君子之意也悲愴何言向伯壽所訪亦此書
耳某苦顛眩極亡聊作記草草思所以廣公意者未盡

萬一

倉使

上提舉生日小簡

北律將周巖冰在候恭惟廉畫優間天神攸相台候興
居萬福某代匱偏城仰切矇覆未由叅侍謹勒手誠申
候典記

裁問彝儀恪具前紙比辰不審台履復奚若欽想澄
案公明百靈潛衛穰穰之福萃集駢臻更祈精調鼎飪

前席峻除式符中外之望

臘月逾中歲功將就天于此時誕毓人傑神湛秋水骨
瑩皓玉卓然為民望時宗實元精之所生華岳之所挺
宜其叶應期運茂建勳庸祿位之崇壽祺之永固自有
穹靈密祐非假區區之禱也

某官圭璋稟質棟梁標竒雅性內融英華外發故能結
知黃屋薦歷要途暫屈外臺益揚德譽既誕辰之已屆
宜寵命之維新名寘廟堂當在朝夕輿情若此非某敢

私

仰惟弧矢令辰有識交慶列城官吏士民孰不以八千
之春秋祝延遐筭想夫袖牋獻笏袂屬肩摩某以郡事
攸拘阻趨賓廡輒具短啟并妙香經目專人賫貢台庭
以伸傾頌之誠伏覲仁明俯垂照察

某竊祿都梁兩見歲臘雖谿徭之境綏靖惟艱而仰賴
庇輝粗知黽勉幸逃吏責切蘄厚德包含俾益安愚拙
實始終全庇之賜感戴瞻依伏紙彌甚

上提鹽小簡

叙問具如右幅庚伏謹時恭惟視事以來燕及列城神明相佑百順來集某衰晚冒昧方此承乏未由叩謁謹上狀叙拳拳之誠率畧幸察

已酉之秋與左右南北異向比訪動靜於彥章謂將自此取道之官庶幾一見延佇之久乃爾差池下情豈勝瞻悵暑氣方熾敢冀調護興居茂對寵休以符頌禱

比承涓辰已諧交印獨以阻濶無從預賀屢之未北望

馳情但深燕雀之抃

武康令莊脩職某妻之姪也廉謹公勤在後生輩流中實不易得欲望端叔察其治行以一京狀薦之如何使司歲額沛然又有前使者文字可以補發惟早賜收錄則幸也恃有一日之雅輒冒言之伏紙愧恐

上提舉冬小簡

冬氣正中朔風凝凜恭惟總鎮雄藩澄晝優游天人參介台候起居萬福某備員於此仰託雲麻尚稽瞻拜謹

具啟承候記史

申詞菲誠祇載右紙不審適辰台履奚似緬維豐財有道察舉至明宥有神靈來相純祉陽剛初復氣令彌寒敢祈上體宸眷加護寢養以副輿人之望

恭惟某官儒猷飭吏忠槩光朝早歷清華備揚聲實暫出司於臺計誠未究於淵謨宜因剛長之辰亟奉溫明之詔峻躋禁從俯協師言某仰席恩輝尤勤願望

亞歲屆期一元肇節羣情胥悅萬彙潛亨恭惟碩德對時

誕延殊祉椿齡鶴算仰同社稷之休某以賤守拘縻無由
趨廁稱觴之列輒修短啟以代慶儀傾祝之誠筆端奚
既

某碌碌無竒徒勞小郡實賴台仁寬假苟追曠尤雖感
懷德誼罔間夙宵然不敢頻貢尺書以溷聽瑩茲因令
序輒布區區仰冀高明特加矜察

上提刑小簡

孫仲益

河橋辭去忽忽又見歲窮雖繫心門下而不及馳書問

安否屬聞造境方叙區區欣頌之私又為左右所先高
詞見寵開讀竦然殆無以為容也

自承弭節少駐一時賓從皆有登龍之喜顧以衰老不
獲躬埽門庭望履幕下自罄鄙悃茲不復縷陳

上僉判小簡

仲秋謹時伏惟贊治雄藩婉畫多暇天人交相台候動
止萬福某也區區將遂趨承之幸謹具啟詞候起居

仰聞盛德美譽之久南北差池未遑望履約而聆緒論

下情傾遡日益拳拳維時商律向中蕭辰正肅不審視
履何如伏惟幕府雍容百神擁佑福祿來宜更乞共靈護
襟靈節調茵鼎魯悰願言不勝虔叩

伏以某官謀猷宏遠識慮優長明哲保身忠嘉許國哲
迂驥足未邁駕行方今任賢使能額俊為急佇聞簡拔
亟踐清華綸綍之頒可拱而俟

上教授小簡

仲夏之月某唯行軒趣駕靈祇左右台候動止萬福某

謹拜手上狀仰塵記史

侯承之敬已列右番適辰炎燠方中不審起居復何似
仰惟德業有相畢來諸社斲順令谷神以俟峻台區區
誠禱

講間高誼歷年於茲芝宇未識其於馳仰則往來於懷
也夫何幸會行遂依仁方欲脩咫尺之間遽辱羽緘文
辭璀璨褒譽過實敬讀三復愧無德以當至意慰感深
之匆匆具謝不謹併冀台諒

恭惟某官志大而氣剛才全而德備文章特其餘事學術自為名家榮中兩科一時歆艷便當展九萬里垂天之翼曷煩小試於儒宮上方夢想求賢清切之拜恐祇旦暮之間耳匪佞

某愚不省事繆當邑寄支弊扶顛其技已窮餘光覆之幸逃厥咎區區下懷願疾其驅非徒快雲霧之披庶幾奉教下風以來通其晦塞倘蒙薰慈特賜與進萬幸萬幸

上教授小簡

即日初暑恭惟戒嚴之暇神物擁佑台候動止萬福某
行有託庇之幸謹具啟仰酬來貺之寵

關

役

恃公寬貸必諒此意而頑鈍廢禮不自遑也某歸田四
年屏伏茅舍遇寒暑之變無以逃比從舍旁作三間以
寄衰朽而百役如毛心力俱盡但悵然作甕中之想亦
發一大笑也

太守

上汪太守小簡

韓子蒼

即日不審風霜偃薄起居飲食何似伏惟躬有盛德神明扶持旌旛所次皆膺百福謹勒手記候問行李萬一伏承肅膺詔命改刺臨川臨川雖褊地連鄱陽此與前輩畫錦之榮亦何以異且謝康樂顏平原之風流未遠也非文章守尚孰繼之然北門承旨今復無人矣二府亦有虛位恐復由宣召入轉堦鈞此天下之公言伏冀為國加忝寢興不勝區區之願

某從學者得執事之文章手抄口誦目眩心驚如是二
十年矣每逢士大夫親承指教及獲奉杖履者輒自愧
恨不謂老境得與民瞻望顏色凡二十年企慕弗獲者
一朝慰滿其意人之幸會乃有如此欽佇使麾頃刻以
冀

某受才無它世間一閒物耳入仕既晚又常齟齬在官
之日淺投閒之日多已分委棄為農夫矣特以戀嫖廩
粟故且垂紳搢笏強顏於士大夫之列頃值紛紜伏藏

巖谷流離困頓所欠一死耳茶然餘生誰復存省乃今
天幸得庇餘光喜極言竦伏幸加察

上太守小簡

林豈塵

詞候饗寢敬遵藝儀具列首牘比辰歲律崢嶸冰霜凝
厲諒惟鈴閣優游神聽民悅冲襟泰定戩穀日隆尚賴
仰體睿眷茵鼎精護倚需召環進涉鈞軸某下情顒禱
激切之至

某久違台範景慕之誠非曠朝夕春中輒貢稟牘以干

記曹政懼僭率自貽嚴譴豈圖謙撝畧等夷貶賜教飭
懷慙聚感何以云喻區區守窮不敢嗣起居之間以取
瀆尊之罪尚冀慈明洞達特賜潤畧行遂瞻拜台躔下
情豈勝欣抃

某官以良二千石分寄共理流惠舒化斯道之行當先
一州而後天下名節之來亟躋柄任中外薦紳所期於
文章事業者此耳虞鮑雖有故事而莆陽郡壁記云有
三台自我州郡始某將與邑人見鳳同鳴以賀然後以

得賢為朝廷天下賀

上太守小簡

林豈塵

詞候籤師敬遵彝式具瞻右牘適辰不審鈞履何似即
日春物融怡和氣宣暢恭惟天錫純嘏神介景福尚願
燕寢密護鼎餗精調仰承旒冕眷倚之重俯慰簪紱祝
頌之誠

恭惟某官道德正傳天降大任布衣而置上衮晝錦而
歸故鄉暫輟經綸姑煩藩翰雖聖意欲均其勞逸然朝

廷有繫乎重輕佇膺綸綍寵還機軸益據遠業光贊中
興某當續烝民崧高之雅以歌頌勲德之萬一
遠瞻巖石仰跂台躔竊惟起館開閣招延賢士禮貌若
在相位某守縣所拘末由瞻拜旂幢以俟進退下情傾
慕無任激切之至

上太守小簡

仲春之月即日恭惟偃藩之暇豈弟宜民神之聽之台
候動止萬福某具狀申問記史伏惟財察

起居常儀布在簡牘即乞上律天時俯遵月令浩養冲粹茂迎純嘏以慰士民千里之志

竊以某官蚤歷華貴為海內名士踐揚中外勲閱甚盛方面之寄畀付重矣上方鼎新治具專用耆艾仰如執事德業地望亟當入陪帷贊襄國論飛詔趣歸可拱而俟也

奔走執事盛名之下舊矣閒散之迹流落湖海曾未接武於門仞備賓客之後塵惟是慕用名誼拳拳於此不

甘自棄也惟執事尚教誨收憐之歷陽地偏谿澗溪山之
勝魚稻之饒為疇昔西川佳處中朝名卿才大夫往往
厭直承明重外之寄以清談坐嘯臨治之中和宣布發
為詩歌播之樂府為世美談自頃倣擾於茲二紀而荒
城未甚葺曠土未全耕蓋因循之治亦有可恨者惟執
事器識靜深才猷通濟開藩未經時綽有譽處適此帑
廩虛竭官治紛拏之餘曾無一毫之斂橫及閭里為清
靜之化民皆樂之得賢之效其速如此

茲者執事布政云初某脩桑梓必恭之禮於榮戟之下
偶自前月為浙右之行比方還自四明息肩村落而突
蹇之餘驚魂愴恍病骨尪瘠未即造前少須安妥謹卜
詹侍仰惟台慈俯賜矜念

上太守小簡

張安國

仲冬之月恭惟開府之初仲相吉德台候萬福疇昔欽
嚮盛名又託年家之契願見久矣昨者旌麾來朝纔幸
一接有懷未盡即日言別悵仰何窮東望軍牙尤切惓惓

四明今為輔郡選用非輕執事以天支之秀茂膺寄託
上慈隆矣政成未報亟當召還佇延佇

頃寓居負郭餘十年王母馮夫人沒葬西山皇妣孫夫
人以婦從姑兩世父待制公季父莆田丞公以子從母
皆葬其下故家視四明猶鄉里以慈惠之師俯來作牧
布宣德意使田野安堵民物康阜則死者有知抑將滲
漉膏澤安於地下惟公念之

蒙貺兩箴禮之過厚非所宜得蒙愧不能已屬方奉陪

郊裡浹日鮮暇未遑作答尚當續致

歐公書豈惟翰墨之精而辭嚴義正千載之下見者興起某何足以辱公此賜也哉而又先正所藏印色猶新輟公秘笈尤所懷感

上太守小簡

玄冥司令寒氣彌嚴恭惟卧護優閒明靈呵衛台候燕興萬福某鄙陋微蹤日依覆庇尚稽趨拜墀廡謹勒柔牘冒塵榮席

修詞菌鼎之誠僭具右楮即辰未審台履復何如欽惟政
平民詠美化益新宥有神天來介繁祉霜飈愈勁凝凜應
時敢祈茂體眷隆厚順攝衛別膺召拜下副士夫之望

恭惟某官以忠誠結主知以豈弟牧民俗事親純孝接
下謙和其言行猷為舉皆過人遠甚是以下車數月續
譽遠揚佇聆明詔入赫巖廊以展經綸之業屬邑下士
祈願尤深

某疵賤小官比因走慶台階獲侍範誨深慰傾企之悰

伏蒙寬仁厚賜寵待又頒特遣之隆誠非屬吏所宜當者某感服恩憐夙夜在念尺牘寸管難究謝誠某違去光儀倏經旬浹瞻依慕戀之情無日少替方圖齋沐以伸記府之問迺辱台慈先捐珍翰仰細容愛之宏既感且愧不敏之答更丐原恕

某伏領台戒以朝指搜訪晉唐墨跡及善本書籍俯委孱微廣搜邑境某欽稟諄誨已徧託士人多方尋訪實不敢徒為虛報佇願得之別具申覆伏乞煥察

某寒薄迂愚苟祿代匱愧無毫末之補每荷盛德包荒
獲免汰斥獨恨有正宰司使冗僚趨事之日淺耳然願
入鑪錘實期他日則承恩佩德猶未晚也依邈之衷更
冀矜照

台閣寶眷伏惟中表俱擁殊禧

支邑別有驅委乞賜台旨誓圖報効之方

上太守小簡

蕤賓紀節氣候梅蒸恭惟偃藩多暇明神攸介台候興

居萬福某愚鄙員益蒙德蔭未獲瞻望台墀謹勒手
啟上干典記

仰詞饗飪之儀具載右紙適日不審台况何似欽想化
深恩洽天祐民懷戩穀之來日加繁衍當浴蘭角黍之
時炎歊漸熾敢覬勉承眷渥厚衛鼎茵亟登近密下慰
卑悰之願

某官以周召申甫之才行龔黃召杜之政德風惠澤徧
浹黎氓最課以書宸知愈厚佇觀召還廊廟熙載奮庸

以康濟四方蕃宣之寄非久淹也

自故臘拜違台光忽見中夏雖依歸慕仰之心靡日不在屏愚而恪遵教條粗修微職恨無可假以造府庭瞻望旌戟邈若雲漢伏紙凝戀神爽飛越

某踈逖凡下雖荷台仁包舉不加鄙棄而每霄壤分殊莫敢頓貢柔訥以瀆威重然間有申迂疏之劄狀未嘗不蒙矜照俯從以是知大人君子寬宏逮下察其誠而畧其禮感悚之私交積方寸毫楮縷縷昌螿愚衷

上太守進秩小簡

薰風謹候炎氣寢隆恭惟卧鎮餘閒天相人詠台候起
居萬福某竊食無補仰荷悒悒尚稽瞻拜履舄謹具尺
牘申詞記府

申候典籤恪載前幅未審邇辰德候復奚若緬惟政治
彌新慶休駢集畏景日加敢祝仰懷體貌妙葆粹真前
即環召式副士鄉之論

某官蘊德業久大之資當運祚興隆之旦暫綏外鎮綽

著休聲進陟樞機諒當指日以攀附鱗翼預切卑情
茲者恭聆光奉煥恩峻躋高秩見聞所暨鼓舞惟均某
以賤事奔走未獲趨慶台屏謹裁短啟實在別絨以輸
雀躍之誠仰乞深仁俯垂省察

去違儀宇之久日覺鄙吝之萌未克走侍榮席徒勤山
仰比嘗冒貢愚訥審已塵玷台廡下情不勝榮幸區區
依戀之誠非言可既

某器劣識卑不通世務自承乏下邑日虞曠斥仰蒙某

官愆其孤負而恕其不逮周旋覆露遂獲安職年餘可
期善替某闔族感銘厚恩固知紀極更冀始終憐念俾永
承於鴻造至禱至願

上太守小簡

天宇明爽伏惟畫諾之暇護愛神勞台候起居萬福某
久託雲庇未期叅侍仰乞上體眷懷倍保嚴重具啟叅
承

上問興寢已布前記不審比來台體何似仰惟含德彌

厚福祿繁衍秋序向高更冀善輔粹和晉膺台寵以副
紳綏之慶

某伏審光奉宸綸升華書殿公議胥協恭惟某官清節
孤忠凜凜為措紳表頃居紀綱地危言勁氣上動冕旒
今茲擁蕃宣之寄政範休聲洋溢中外是宜有此褒擢
拘擥無由稱賀雀躍之情倍百稠品

伏承聖恩優異中間或傳抗章力辭未即拜命以故脩
慶後時罪涉稽怠無以自明尚恃台亮察其非他尤以

為幸

尺牘之問久不徹於麾席非敢偃蹇第以人微位卑數
數坐通柔訥恐貽瀆尊之誚故援毫而報者屢矣至於
引領榮輝如渴念飲未嘗一償所願何當趨伏下風庶
叩台誨之一二臨楮悃嚮

今歲境內雨暘應時喜種繁植有秋之慶夫復何疑春
夏間雖粒估差昂而民不告病善良安堵茲固豈弟宜
民鎮撫有方所以千里蒙福日用而不知也然郡小舊

福未足回旋行將入告嘉猷均惠海宇遲暮之人實夙
夜以冀

上太守小簡

秋氣漸涼伏惟坐嘯黃堂天人叶相台候動止萬福某
仰棲巨庇末由叅覲伏乞上為宗祐倍保台重謹奉狀
申候養寢

恭審光膺帝命暫領專城伏惟下車以來神民胥悅百
順駢臻某稍遠旌麾未遂鳧趨稱賀伏冀台慈特垂矜

察

頃年在雲川瞻望台範違離屢易星霜邈仰拳拳自後
雲鵬蓬鷁聲迹亦遠豈謂侍御暫辭白筆來塞彤襜而
某乃辱在部封之下其為欣幸倍越等夷

恭惟某官才高德重為時偉人頃間抗章力丐外補仰
惟英風義槩足以律貪草汙況朝家正欲澄清百執如
侍御操履端方不畏彊禦自當峻陟中司使朝廷尊嚴
顧此遠服豈能久留佇聆迅召以安輿論

上太守小簡

季夏酷暑伏惟辨嚴豐暇神明靖共台候動止萬福某
仰藉輝潤行遂參拜下情無任傾溯謹奉啟上承夔寢
候問興居薄具彝儀比辰不審台履何如炎氣正隆敢
勺節宣時令謹護茵鼎倚須不次之擢伏紙謹禱

伏審光膺綸綍榮領郡符恭惟歡慶某沉迷朱墨日不
暇給不克以時修貢賀幅罪陟簡慢愧負無以自容尚
冀台慈矜恕

仰惟某官才華夙著時望攸歸雖淺更臚仕而筮鋪大業未遂發揮今茲遠服政恐未及下車而玉節促召凌厲要途此輿論所期非末僚之私情也

伏自違遠台範頻更年籥傾仰之素實積拳拳薄宦僻左書問不復仰塵記府今乃辱在奔走之列望塵非遠預切欣抃

上太守正小簡

僭伸慶禮謹如右番王春布暖即日台候何似恭惟偃

藩清豫神明孚相對時受宜某苟祿小邦託庇褒寢瞻仰
巨蔭正賒參侍祇重詠思敢乞惠時倍奮冲理佇調鼎
鼎庸副具瞻繼續頌禱言不盡意

引去麾戟屢更弦晦賤役鞅掌不克時叩台屏下情瞻
慕夢寐以之何當密侍坐隅一聽驅策東向帽繫神爽
飛馳

某竊食江濱日庇幘之賜惟是汗簡所以將屬吏歸
依之勤者宜相望於記室也而職在奔走每以瀆尊自

嫌坐此柔訥不敢數說台聽雖高明曲推情恕顧如簡
率之迹何握管及茲無渝愧恐三陽交泰萬寶棗通惟
時哲人滋對殊祉椒筵密邇趨賀無階引領台閣第勤
善頌

某官宿德雅望簡在淵衷留連符竹未快輿論履端之
始賢以類升竊揆要除旦暮可冀霽然霖雨以福蒼生
實士大夫之公願非某一人之私言也尚冀節宣慰茲
傾禱

某不善製錦療曠四閭宏量有容少寬謹斥謹脩所未
至無負矜憐伏丐厚德孚亮幸甚

蘭堂寶眷恭惟均福新元壽筭人有千齡之祝也

上太守小簡

歲事更新恭惟卧護名藩天人欽相台候動止萬福某
行即趨伏柴戟以祈瞻拜先具尺牘仰干記史之聽
月儀之敬虔列右紙通辰霜色晴寒不審台履復何似
仰惟政成訟簡千里生春自天降康時萬時億更祈上體

簡記增比鼎茵嗣聽促還以慰天下膏澤之望

仰惟某官行高而識遠器博而用宏自早膺於眷知即洊更於委寄固宜入陪禁橐日罄論思而乃斂大惠於一州殊未足以究所蘊然上方循名責實舉行神雀五鳳故事有如治最豈久於外佇膺前賈之思即慶徵黃之寵此公議所在非下邑小吏趨事之初薦容悅於門下也

某早從搢紳先生遊竊服台誼非一日矣勢絕雲泥無

階一伸望履之敬巖瞻斗仰徒劇此心茲者天假其便
得以屬吏仰被約束其為欣幸豈勝名言何當即遂進
望光儀以快疇昔臨風仰德心如川流

上太守正小簡

王正謹始恭惟坐鎮侯藩明神欽相台候動止萬福某
遐瞻棨戟無階望履謹具柔訥仰申記府之問

紀時祇詞虔列右記邇辰陽和布令不審台履何似仰
惟擁幡南國與物為春茂對昌辰戩穀時萬更祈密調

天令養福尊生佇聽賜環以慰中外之望

某官雍容和緩而發之以義剛毅果斷而濟之以仁故見於為政寬不失之弛而猛不至於暴使斯民善有所怙而惡有所懼千里之內熙熙然日安於中和之化公之所以德此邦者蓋無窮矣今茲履端之始孰不相與鼓舞祈祝願天報以福而長為吾民之庇然此特邦人之私也所以祈公者未大况節屆三陽在易為泰蓋內健而外順當冀不日促還進秉鈞軸使天下均被其賜

則公施設可見矣有識所祈非敢為佞

五百家播芳大全文粹卷六十一